

夏  
内  
史  
集

藝海珠塵

南漚 吳 省蘭 泉之輯

婁縣 張 允垂 升吉校

夏內史集

夏完淳纂

卷五 五言律

花朝約漱廣遊鄒仲堅園亭阻風雨有作

欲渡芳洲去蒼茫迴不通樹迎神女雨花避大姨風隔  
水同千里浮雲合九峯王孫愁日暮春草碧煙中

寒食掃墓

遺恨荒原綠東風闐闐開龍蛇知火息鴻雁及春迴芳  
草新煙積輕風舊雨來王裒私教授長起蓼莪哀

偶見荆隱舊莊殘英未落餘露泫然賦示武功  
舊日風流地園亭日夜開金樽移草木綺席隱莓苔西  
苑三春靜東風百鳥哀輕花偏不落如待玉人來  
四海盡風塵桃源欲問津風來香入座月靜錦成茵花  
鳥酬知己雲山待主人王孫歸去後春色到東鄰

偶與昭南女弟談懷荆隱女兄

不堪春色盡卜宅到江潭空谷傳三隱

余號小隱昭南號蘭隱

名

閨美二南

荆隱字美南

占風知少女鬪草佩宜男遙憶大姑

處天花動草庵

留別

與汝三春別離亭奏管絃鶯啼芳草外燕乳落花前殘  
杏飄紅雨垂楊隱綠煙年年愁滿地此去更淒然

晚眺有憶

不繫扁舟久登臨淚滿纓暮雲山外斷春水月中明蔓  
草雲間成輕煙海上城佳期空冉冉遲暮若爲情

登樓

極目兵戈際登樓暮轉哀月明揚子渡江鎖越王臺歸  
鳥衝林起輕煙隔岸開五雲飛不盡知是帝鄉來

杖策

杖策獨行吟悠然思故林  
雨來千樹暗日落九峯深  
寂寂荒煙草迢迢起暮陰  
曹溪何蕩漾猶有白雲心

夏日雜作四首

五月池塘好幽欄木槿開  
羽觴飛乳燕銀甲坐新苔  
黃鳥樽前換青山雨後來  
遠人期未至日暮獨登臺  
歲華忽已半歸國計何如  
落日低秦望青山入禹餘  
滄波空際遠天闕望中虛  
自恨浮生拙臨風欲羨魚  
花草醉醺醺江山恨別離  
浮家隨白鷺行野聽黃鸝  
片雨征帆入孤雲遠樹移  
瑤琴流水意誰是古鍾期

煙水寄輕舸傷心正鬱陶  
朱霞江草動春雨石華高  
行似思鱸膾名猶愧鳳毛  
五湖風色好愁絕水滔滔

重過曹溪

暮雨麗空林黃鸝自好音  
未申歸國意徒有報君心  
戰伐青山在風塵白髮侵  
曲江如有意彷彿翠微深

對月憶南行者

自拜南州使清光幾度看  
滄洲天際晚芳草月中寒  
屬國思歸漢嫖姚擬策壇  
不知江上雁何日到長安

送友北行

故國江山在孤臣意若何  
滄江驚白髮芳草渡黃河  
汝

自懷裘馬余還恨斧柯高皇豐沛地愁絕大風歌

有作

漢家程不識刁斗拂明霜青翰依藩伯彤箴愧省郎涼  
颺歸細柳旭日自扶桑湖海多豪氣幽懷兩不忘

得漱廣訃

忽得胥塘訃傷心自白頭龍蛇千古夜猿鶴萬山秋閔  
亂劉琨恥招魂宋玉愁無情天目水不解向西流

同恂如因培兩外兄舟宴寄別鑑開家舅

入幕思投筆沾衣愧請纓盤龍呼入陣公瑾笑談兵煙  
樹連雲霧江湖弄月生一聲離笛晚無限渭陽情

卽事三首

復楚情何極亡秦氣未平雄風清角勁落日大旗明  
縞素酬家國戈船決死生胡笳千古恨一片月臨城  
戰苦難酬國仇深敢憶家一身存漢臘滿目盡沙落  
月翻旗影清霜冷劍花六軍渾散盡半夜起悲笳  
一旅同仇誼三秋故主懷將星沉左輔卿月隱中台東  
閣塵賓幕西征愧賦才月明笳鼓切今夜爲誰哀

歸途夜泊

谷水重遊地悠悠獨此心落星依古戍斜月半幽林  
客散夷門市愁深澤畔吟夜闌人語靜倚檻露沾襟



送杜子皇歸故鄣

分手金陵道相逢倍黯然  
鶯啼楊柳岸人在木蘭船  
客路三十里征衣十二年  
計程歸夏口明月兩回圓

旅夜聞雁

旅館孤燈夜愁吟步玉墀  
秋風人去後煙水雁來時  
暮嶺歸雲斷寒沙落月遲  
平生湖海意三繞向南枝

哭吳都督六首

星隱中台坼天高北斗斜  
陣傳鸛鶴戰地隱龍蛇  
故壘虛寒月靈旗捲暮霞  
五湖風雪夜尊酒哭平沙  
幕府歸何地孤臣血未乾  
杜鵑江月苦精衛海潮寒  
煙

草空殘壁雲山舊築壇。孟嘗賓客散，齊鉞爲誰彈。  
知己功名盡，傷心叩九關。餘光留日月，遺恨滿乾坤。  
湖海門生誼，荆榛國士恩。滔滔江水濶，萬里獨招魂。  
丞相門誰掃，公孫閣不開。白龍千古恨，黃犢幾人哀。  
江海猶生氣，風塵未盡才。雲旗排浩蕩，毅魄獨歸來。  
野哭樵蘇徑，浮家戰伐年。畫圖空督亢，虛塚像祁連。  
白草荒春月，青燐大澤烟。漁燈明兩岸，猶是水犀船。  
感交悲故吏，嚙指痛孤臣。有客留滄海，無人哭壽春。  
王孫城下飯，公子屬車塵。知己今誰報，高歌泣鬼神。

元日大霧

丙戌

萬里河山氣蒼茫霧不開忽逢三朔至疑有百靈哀漢  
日分南極沙隱大台回中春色滿想像翠華來  
漠漠蒼龍闕黃雲迴不收去年今日事此地昔人愁  
鳥雀朝三殿風塵辨九州扶桑新氣象玉冕拜通侯

人日懷舒章

帝京戎馬暗人日故人違御柳金堤是宮花玉燕非傷  
心子山去何日少卿歸猶憶河梁別春風淚滿衣

別雲間

南冠草

三年羈旅客今日又南冠無恨河山淚誰言天地寬已  
知前路近欲別故鄉難毅魄歸來日靈旗空際看

拜辭家恭人

南冠草

孤兒哭無淚山鬼曰爲鄰古道麻衣客空堂白髮親循  
陔猶有夢負米竟誰人忠孝家門事何須問此身

寄內

南冠草

憶昔結褵日正當擐甲時門楣齊閼闕花燭夾旌旗問  
寢譚忠孝同袍學唱隨九原應待汝珍重腹中兒

寄荆隱女兒兼武功侯甥

南冠草

門閼推江左孤忠兩姓全十年黃鵠咏三載蓼莪篇愧  
負文姬孝深爲宅相憐大仇俱未報賴爾後生賢

柬半村先生

南冠草

樂令竟如此王郎又若斯自羞秦獄鬼猶是羽林兒月  
白勞人唱霜空毅魄悲英雄先死路却似壯遊時

聞大鴻仲熊訃

南冠草王昶云蘇州府志顧天達字大鴻貢生天達字仲熊諸生

崑山人大學士鼎臣元孫延安府推官咸正之子順治三年丁亥上海諸生欽浩通款舟山疏吳中忠義士二十三人首及咸正乃與同事四十餘人並死天達兄弟亦以藏陳子龍故俱死

叩閭應有路兄弟竟齊遊盱眙同時盡哀融一日收黃  
壚人已變清淚夢中流如赴增城約停驂待楚囚

毘陵遇韓文

南冠草

宋生裘馬客忼慨故人心有憾留天地爲君問古今風  
塵非昔友湖海變知音洒盡窮途淚關河雨雪深

被羈待鞠在皇城故內端宅

南冠草

孤臣魂已斷況復見長安歌舞愁雲散池臺落日寒重  
來中貴宅空掛侍臣冠一片銀鐙影還同劍佩看

御用監被鞠拜瞻孝陵恭記

南冠草

城上鍾山色松杉落翠微朝光羣鳥散暝色二龍飛壁  
月沉銀海金風翦玉衣孤臣瞻拜近泉路奉恩輝

七夕步蠡水先生韻

忽然秋滿地愁裏度良辰有酒還同醉無衣豈獨貧月  
明河鼓動露落海闊新欲就君平卜升沉數未真

寶帶橋

連天芳草青極浦獨揚舠歸雁舟前落愁人夢裏聽花  
光明曉霧波影亂春星欲訪靈威穴孤帆入洞庭

順天

舊時雙闕曉陰雨翠華來白玉螭頭仗黃金駿骨臺宮  
雲浮睥睨殿月鎖莓苔太液波翻後魚龍夜夜哀

應天

吳楚茫茫盡神靈日暮趨大江春水濶京口夜雲虛芳  
草三山恨斜陽六代餘孝陵回首處慘淡斗牛墟

西安

無恨章臺柳行人幾度攀秦人空四塞漢殿鎖三關荒

草龍蛇囿浮雲虎豹閑雁飛銀海瀉千古恨驪山

開封

豫州千里國京闕萬年宮北維周謨重東都漢武雄梁  
園秋竹雨漳水夜臺風歌舞西陵歇黃河落照中

臨淄

青兗名藩地臨淄十萬都秦碑沉古壁魯殿入平蕪日  
觀春綿渺天門畫有無黃河如帶白千里自模糊

太原

高接天關險恒山人簣難黃雲知塞近白草入春寒龍  
首河三折羊腸路九盤長垣欣不落寶劍爲誰彈



成都

巴字三迴國成都萬里橋雙江春浦漲一帶曉天遙青  
鳥高唐雨黃牛灩澦潮升沉虛寂寞卜市竟蕭條

武林

錢塘佳麗地楊柳露新條吳越分煙樹江山擁絳霄月  
明蘇小墓風怒伍胥潮滿眼滄波綠旌旗鎮寂寥

秋夜感懷

登樓迷北望沙草沒寒汀月湧長江白雲連大海青征  
鴻非故國橫笛起新亭無限悲歌意茫茫帝子靈

代人贈鎮府

頒封周正朔承制魯元年再造由人力中興賴爾賢山  
河分爵土嵩岳任藩宣德以君臣協才非文武偏六螯  
還鎮解八柱獨承天日月雙珪合乾坤一氣懸上公分  
劍履大將駐旌旃外宅三千隊中軍百六一作八百掾鯨皮  
橫海節犀炬伏波船金角催鳴鼓牙旗滿控弦汎汎江  
月小陣濶海雲連每御黃龍出齊歌朱鸞旋禹餘糧載  
圯秦望石生煙鎮海遙通蜀藩封直到滇投醪均下伍  
彈鋏滿中涓位在通侯長身爲諸將先如雲起吳越指  
日度幽燕渤海宜銘石狼胥更策鞭扶桑扶日上大樹  
大風前陰雨膏羣姓晞陽被九泉元功存社稷遺澤在

山川方叔基常武言歌江漢篇

插柳

千條拂翠微雨後碧新肥却憶靈和殿楊花滿地飛

藝海珠塵

南漚 吳省蘭 泉之輯

婁縣 王朝恩 笙蘇校

夏內史集

夏完淳墓

卷六 七言律

讀陳軼符李舒章宋轅文合稿

十五成童解章句每從先世託高軒  
庚徐別恨同千古  
一作蘇李交情在五言  
雁行南北誇新貴  
鷁首西東憶故園  
獨有牆頭憐宋玉  
不聞九辨弔湘沅

春興同錢大作

上苑東風試早鶯，故宮依舊百花明。  
江帆入鏡移瓜步，朔馬如雲走石城。  
金鼓平陵憐翟義，旌旗滄海葬田橫。  
傷心終夜看牛斗，醉把吳鉤萬里行。

自憐十載悞儒冠，獨釣滄波行路難。  
雨後新花宜夜醉，月中寶劍試春寒。  
臨江煙樹分吳壤，隔岸旌旗擁漢官。  
聞道扶桑天子氣，何人不向五雲看。

池塘楊柳綠陰垂，煙雨飛花滿院悲。  
三月曉迷吳苑路，萬年春靜禹陵碑。  
江湖夜夜呼精衛，草樹山山哭子規。  
最是關情無限恨，胡笳偏向月中吹。

谷口桃花何處是武陵猶有避秦源江頭采葛供勾踐  
堂下幽蘭祭屈原春夢却隨千里雁夜愁不斷萬山猿  
今年寒食昌平路蔓草東風十四園

萬頃滄江未卜居風塵生計問樵漁錦帆寂寞吳趨曲  
石室淒涼越絕書回首故鄉春夢裡傷心荒草夕陽餘  
南朝鐘磬三千界一帶蒼煙散紫虛

河山風景淚堪揮江上傷心對夕暉蜀道盡悲諸葛死  
漢家猶望少卿歸五湖義士蓮花劍七郡良家柳葉衣  
結客少年情不淺平林裘馬放春圍

建業河山萬里遙煙波天際出金焦星辰夜隱移南極

江漢春潮鎖北條羽獵自高京口樹鶯花不度廣陵潮  
琵琶馬上愁胡語青塚年年恨未消

片帆春色滿江湖震澤神靈動有無曉氣橫開連百粵  
晴光迴落見三吳飄零煙雨招漁父躑躅風塵問酒徒  
知爾中宵沉醉後寒霜長嘯拂伊吾

錢長孺三春臥病合卷而起詩以嘲之

王本題下有脩

字或長孺名也

九天環珮石榴裙翠幌妝樓謁細君花入珠簾紅雨過  
香通霧縠紫煙分秦樓曉出東南日巫峽春歸朝暮雲  
賦就感婚蠲渴疾不須重作釋愁文

夢懷長公郭侍御五竺崔舍人

乾坤戎馬倚吳鉤，猶憶當年太姥遊。  
夢裡雲霞雙鳳闕，醉來煙水一漁舟。  
窮途知己誰青眼，歧路傷心已白頭。  
遙想天南新侍從，茫茫滄海動新愁。

生平口號

生平無計更依劉，短髮蒙茸愧楚囚。  
十載鶯花遲暮客，三春煙雨別離愁。  
浮生蝶夢莊周榻，壯志鴟夷范蠡舟。  
同學少年零落盡，飄然江海一輕鷗。

憶侯幾道雲俱兄弟

王昶云：侯演字幾道，嘉定人。嗣會長子，詩文操筆立就。

麗絕人弟。

雲俱，過目成誦，皆諸生。順治乙酉，大兵徇地至嘉定，七月，城破，與俱自沉於



家之葉池演潔從焉幼弟靜  
年十一補諸生後亡命死

春城煙霧曉陰陰俯仰斜陽弔古今  
萬里河山猶故國九京風雨自同心  
欲知真主觀司隸未見孤兒屬羽林  
鶴唳華亭人沒後河橋一闕淚沾襟

四月七日寄研德武功叔姪去年此夕與二子  
步月新堤得屈平卜宅之句不忘先文忠之  
識園亭猶是而死生漂泊心傷矣

園林入夏雨模糊寂寞青門恨草孤  
雲水橫從新白社河山如隔舊黃壚  
亡秦猶有張公子哀郢誰憐屈大夫  
重到竹林尋二阮風流還似去年無

簡顧偉南

楚客天涯久不歸  
平津東閣有光暉  
紫鱸鄉味思張翰  
黃耳家郵問陸機  
三省衣冠新墨勅  
百花煙水舊柴扉  
夢魂夜夜蘭亭月  
驚起扁舟淚滿衣

有嘲

重閣欲避曉風悲  
煙霧茫茫柳半垂  
歌舞微風青雀扇  
興亡斜照赤烏碑  
不容東舍王昌嫁  
却許西鄰宋玉窺  
正是江南行樂地  
清商一曲爲誰吹

東遺民沈師

姜如山兆辨云沈安濟名哲當日同  
王震在夏忠節署中存古有師事之

龍故云師宏濟入本朝以布衣終後七十一  
子見王勝時朱古鮑詩所生子三歲殤卒無後

微風南浦暮煙通落日西山素影同歧路見憐青眼客  
知心惟有白頭翁交情牢落乾坤外舊業荒茫戰伐中  
萬里行蹤渾未定水雲何處不相逢

舟中憶邵景說寄張子退

姜兆熊云邵景悅卒於乙酉見王僧十三君咏

註以爲年只二十餘此詩言浮生哭故人亦謂其已死也又下句邵生黃土句尤明確清溪詩傳謂卒於順治八年說

登臨澤國半荆榛戰伐年年鬼哭新一水晴波青翰舫  
孤燈暮雨白綸巾何時壯志酬明主幾日浮生哭故人  
萬里飛騰仍有路莫愁四海正風塵

東玄照家語

天涯兄弟掩柴扉故國遺民共採薇  
江海何年傳錦字風塵吾黨半緇衣  
帝秦蹈海人猶在復楚依牆事已非  
日暮雁行愁欲斷鵲鴒原上白雲飛

贈徐似之侯智含

煙波寂寞問樵漁五月柴門獨著書  
草澤何年平逐鹿江湖無地泣枯魚  
九章哀郢人如在三戶亡秦氣不除  
先世交情千古事天門咫尺倍欷歔

偶念三秋舊集憶景說兼越行諸子

飄泊笙簧阻夢思蒼茫雲水更誰知  
遙憐白下千秋會頗學黃初七子詩  
滿目塵迷北闕傷心越鳥向南枝

邵生黃土風騷盡三復遺篇尚可師

春興

花落長干起暮濤傷心極望步蘭皋梁園雪後朱旗繞  
魯殿煙中赤羽高新雨江邊埋白骨故營淮口暗青袍  
請纓爲問誰家事漫酌春泉聽伯勞

離籠燕子逐芳菲煙景平康動翠微二月長堤香草靜  
三春古道客鴻稀龍沙雨濕桃花馬雞塞風輕柳葉衣  
堪歎旌旗明北地殘梅應傍戰場飛

冠帶追隨滿帝京黃金臺畔五雲明焚香設謁含元殿  
賜錦誰開大宛城置鼓晨連弓劍氣龍綃夜隱珮環聲

潯陽烽火何時息百嘯東風御柳鶯

春光搖曳古揚州宛轉東風十二樓洛浦鸞笙麝子晉  
嵩山鶴馭夢浮邱黃鸝數嘯疎楊裏玄燕雙飛古陌頭  
芳草堪憐幽谷老玉關何事問封侯

江城

江城五月動哀

一作清

笳一片

塵到海涯沙幕

一作漠

未

消前帳雪景陽先發後庭花征帆夜雨難歸國寶劍寒  
霜已破家龍驤黃龍辭故主李陵碑上暮雲斜

贈舊閩李憶蘭

無定河邊起暮笳受降城外逐輕車射鵬雲度金微落

回雁風高玉帳斜老去吹寒秦箴策歸來彈徹漢琵琶  
當筵忽話遼陽事獵獵霜飛兩鬢華

夏日幽居

落日西山起暮煙芙蓉出水自田田百年蓬鬢風前換  
一片征帆雨後懸白鷺孤洲煙裊裊黃鸝千樹月娟娟  
幽扉習靜無人至讀盡南華內外篇

愁絕關山獨枕戈亂離生計託煙波雲車無路通閭闔  
土室何心咏蓼莪走馬空城雲裡失啼鶯深樹雨中多  
不堪極目風塵際山鬼微寒弔女蘿

一片孤帆入洞庭兩峯曉夾具區青江樓日滿人皆醉

浦口風來我獨醒  
束髮羞同孫討逆  
佩刀欲指衛丁零  
何年直搗幕  
立馬燕然擬勒銘

得東報懷漱廣

風流不減五陵豪  
夜夜樓頭太白高  
瑤草輕寒歸蕙苑  
石苔微雨動蘭膏  
風連海氣通宸輦  
日射江光入御袍  
犬馬懸心真不淺  
五雲如在聖躬勞

軍宴二首

十萬鰲鱣偃

一作掩

翠微風雷黃石間  
兵機月寒壁壘侵

金柝風入旌旗動  
鐵衣自愧青藜陪  
客座幸從細柳識

一作清

宵醉帳下南塘夜獵歸



星郎自愧早彈冠天策從來貴梨壇娘子軍中春色醉  
將軍樹裡月光寒遲遲畫舫垂綃幕款款行廚洗玉盤  
我已破家酬大鎮相逢斜拂劍霜看

訪友不遇

錦衣玉靶自翩翩白羽瑯弓滿控弦萬壑風迴寒角靜  
千山日落大旗懸冠軍油幕羞生數好時雲臺最少年  
乘醉扁舟尋鐵壘牙門深鎖白雲邊

魚服

投筆新從定遠侯登壇雪飲頭蓮花劍淬霜重  
柳葉衣輕漢月秋勵志雞鳴思擊楫驚心魚服愧同舟

一身湖海茫茫恨縞素秦庭矢報仇

弔漱廣至西塘有述

谷水西塘兩地分  
雁行風雨恨離羣  
可憐玉樹埋青草  
曾向金庭訪白雲  
縞素六師黃石法  
死生一戰水犀軍  
知心惟有牙旗月  
夜夜依人恐是君

同友人過東道院

一片江聲入晚笳  
軍中高宴逐輕車  
幸陪紫塞將軍座  
來訪黃庭道士家  
玉洞花明秋不夜  
錦屏雲起暮爲霞  
此身竟逐征蓬去  
欲叩天門路已遐

鵲衣

鵝衣束去獨登臺歌舞筵中聽轉哀  
趙信城頭秋月滿  
李陵碑上暮雲開  
吳江落日圍山盡  
震澤微風入陣迴  
滄海一樵亡命後  
橋邊黃石待人來

題崑山水月殿

驚嶺岩堯谷水陰崑山迢遞快登臨  
始知靈運尋山意  
猶是曇摩泛海心  
古寺松聲清磬遠  
寒潭雁影碧雲深  
青絲天棘風流在  
如見當年祇樹林

九日大風雨同智合夜飲

高秋夜雨不聞聲  
旅館孤燈酒自傾  
寂寞黃花千古恨  
婆娑寶劍一身輕  
風塵握手同兄弟  
江海知心託死生

遙憶故園芳草路滿離叢菊戰場明

道中作

山行三日萬山連今日纔開一面天石徑漸平看馬去  
雲林初霽見泉懸無人主碓舂偏急有婦當壚客易前  
下筴不須錢滿百荔香新酒縮頭鱸

除夕追和廣成先生韻

案侯嗣僧像瞻一字廣成性孝仕宦十餘年屢  
以母老乞歸爲人清剛絕俗獨喜引掖後進以  
文章道義相切劘明季復潛令下賴其力得  
寢所著根極理要至性溢楮墨間名納言集

山河風景憶前年淚盡鮫人百斛泉鳳輦已空當日恨  
鹿門深愧古人賢江湖潮信潛歸越秦晉風雲半入燕

喜 卷五 賦  
三  
悅對九京如可作國讎家難問蒼天

元旦

丙戌

不知景物又新年無限傷心對九泉虎豹遊魂長作客  
龍蛇守蟄更誰賢湘江寂寞空哀郢易水蕭條未報燕  
白首同歸交誼重國殤兩日南天

秋日避難膠東柬智含

昨夜秋風起洞庭三山落木曉風輕親朋交態渾如夢  
湖海生涯敢獨醒我已無家隨汗漫知君愁坐獨傷停  
故人頓洒河橋淚南國招魂感鵲鴒

寄研德

案侯淵字研德後更名涵字仲德嘉定人岐曾  
子岐曾字雅瞻震陽季子少奇慧年十一與兄  
峒曾岷曾同補諸生學使者表其廬曰江南三  
鳳及長博覽工文重氣節敦行誼吳門婁東雲  
間壇坫角立岐曾調劑其間相與振興古學獎  
掖後進主文章名教之柄者三十年順治丙戌  
以匿故人陳子龍被逮備受慘刑者凡二十七  
次終不屈巡撫土國寶陰使人致酒脯曰汝湖  
海無名待家信通得不死岐曾曰我已無家何  
信爲遂受刑門人私諡曰文節先生岐曾子汎  
洵汎與岷曾子演潔瀚羣從自爲廢和有上國  
人龍之譽汎字記原崇禎壬午順天副榜明亡  
不復應舉老居柵園因以自號洵早卒汎少補  
諸生博習經史落紙如飛從弟澍亡命有司名  
捕之汎挺身代繫久之事解寄蹤吳市一時名  
士推主文社少與伯仲及羣從並受經黃淳耀  
而汎尤爲淳耀所引重及卒鄉黨私諡貞憲先  
生有掌亭集錢塘陸麗京稱其述作勃然若鞭  
雷霆沛然若決

江洞子開國

風塵大野日將曛滿眼悠悠獨識君潘岳已成懷舊賦  
陸機還作辨亡文羞將短供服愁對寒山起暮雲  
與汝相期遊白社孤鴻天外恨離羣

送馭閱蔣大南行

案紹興府志蔣平階字大鵬江

青浦陳子龍主幾社壇圯招致海內文人見平  
階大驚亟邀入社及明亡唐王僭號於閩平階  
赴之授兵部司務晉御史抗疏劾鄭芝龍跋扈  
志士壯之福建破遂亡命服黃冠假青鳥之術  
浮沉於世東至齊魯登泰岱謁曲阜轉徙吳越  
間樂禽檣山水遂家焉康熙十七年朝廷開  
史局徵博學鴻詞故人欲爲平階道地亟馳書  
止之平階詩文詳贍典麗宗雲間派以西京盛  
唐爲要歸於書弘覽洞究無遺好談幾禮人佚  
事感慨跌宕淋漓不能休酒闌燭地涕淚隨之  
聞者服其才而哀其志焉著書十餘種卷以百  
計歿後皆散落無存遺命葬若耶之樵風涇

靈旗彷彿朔風寒俠客悲歌迴不歡芳草多情兵甲後  
白雲何處別離難滄溟漁父長哀郢湖海狂夫矢報讐  
此夜一樽傾盡醉夢中歧路恨漫漫

遇盜自解

浪迹烽煙獨此身天涯孤客淚沾襟綠林滿地知豪客  
寶劍窮途贈故人無復青氍毹王氏舊自憐竇鼻阮家貧  
逢人莫訴流離事何處桃源可避秦

十二月十八立春

可憐又是艷陽時孤客征衫泣路歧草木不欣秦正朔  
云冠猶想漢威儀落梅入夜迎風急細柳知春遇雨遲



聞道海南多王氣扶桑先浴萬年枝

寄荆隱女兄

書劍天涯轉自親孤帆漂泊迴傷神自憐愁立寒塘路  
獨恨行吟澤畔身黃土十年悲故友青山八月痛孤臣  
當年結客同心者滿眼悠悠行路人

野哭

維下聲名並李膺龍門天半許誰登秋風零落三千客  
暮雨寒生十四陵毳帳近連青瑣闥明駢先踏玉河水  
魂飛故國知何處擊筑悲歌意不勝

感舊步仲芳先生韻六首

案嘉善縣志錢棻字仲芳中丞士晉子崇貞王

午舉人流冠披猖閭閻吏可法招致幕下不就  
博通寶典鍵戶謝客著書于大滌山賦詩作畫  
遠近無不瞻仰年七十八著有書

宗邑乘讀易緒言莊子緒言諸書

故國鶯花滿地殘當年風景未應闌煙籠翠柳凌波靜  
雨過紅梨入夢寒芳草已經迷曲巷春光依舊滿勾欄  
江南一片傷心月多少琵琶馬上彈

五更風動角聲殘清酌沉沉歌舞闌蝴蝶夢中春月苦  
杜鵑花外曉風寒如雲錦袖歸塵土却月珠簾覆井欄  
酒醒忽思稽叔夜廣陵一曲更誰彈

夜靜孤城玉漏殘登樓長嘯客愁闌三年寒食催征夢  
二月春花試曉寒故國風塵空擊楫舊園花鳥獨凭欄

五陵年少歸何處  
匣裡雙龍不敢彈

曙鶯啼過百花殘  
客子無衣泣夜闌  
錦瑟按來人不見  
玉笙吹徹夢猶寒  
珮環曉醉芙蓉障  
羅綺春嬌芍藥欄  
回首風流成往事  
幾行紅淚暗中彈

舊都風物暗凋殘  
東海孤臣淚未闌  
睥睨浮雲三殿曉  
采鳳落月九天寒  
宮花寂寂啼黃鳥  
御柳深深隱畫欄  
裘馬京華零落盡  
鐵冠高臥有誰彈

蘆荻臨風故壘殘  
漂零湖海又春闌  
子胥江上吹簫苦  
如意堂前擊筑寒  
雲淨平沙連碧浦  
樓空斜月上朱欄  
孟嘗賓客隨煙草  
更向誰門倚鐵彈

寒食雜作同錢二不識賦

王本有末章兼贈不識六字王昶云錢默字

不識嘉善人旃子讀書日數千言八九歲能詩文弱冠有孺子集登崇禎癸未進士知嘉定縣劉河之開籍役賦功民用不擾母病挂冠歸父以相繼沒削髮入黃山卒於雲門顯聖寺著有思存詩集初默逃方外時妻魏氏年二十六默亡魏未之信又二十餘年招魂歸慟絕

朔風廣漠寒客子飄零行路難北首可憐秦郡縣南來無復漢衣冠昭關去後難亡楚滄海歸時未報韓袖裡吳鉤愁獨倚霜花夜夜月中看

親朋亂後幾人存湖海交情酒後論今古文章多薄命江關詞賦半招魂王孫一飯誰知已漂母千金敢報恩曾作信陵珠履客幾回慟哭大梁門

孤臣伏臘

天野哭茫茫幾歲年笛裏關山吹漢月

帳中霜雪滿

煙風塵獨上要離墓江海空浮范蠡船

雲水滔滔歸不得千金駿骨有誰憐

十年裘馬混風塵猶是先朝侍從臣采菊每邀彭澤令

看衣不讓武陵人湘潭奇服憐哀郢錦水立亭恥劇秦

故國銀魚新換酒玉壺秋泛莫辭頻

按王本作寒食後二首

### 虎邱遇九高

竹馬交情十七年飄流湖海竟誰憐知心獨弔要離墓  
亡命難尋少伯船山鬼無回江上夢楚囚一去草如煙  
姑蘇明月愁人醉翦燭無言更惘然

由丹陽入京

萬里河山拱舊京，楚囚西去淚如傾。  
斜風衰柳丹陽郭，細雨孤帆白下城。  
殘夢忽驚三殿報，新愁翻覺一身輕。  
從軍未遂平生志，遺恨千秋愧請纓。

西華門與同難諸公待鞫

同舟今日半南冠，魂斷雲山舊築壇。  
仁壽鏡移江月落，景陽鐘動曉風寒。  
誰將杯底消秦獄，却向囊頭識漢官。  
相對銀鐙趨右掖，夢中猶作侍臣看。

藝海珠塵

南匯 吳 省蘭 泉之輯  
金山 焦 晉 畫三校

夏內史集

夏完淳篋

卷七 七言絕

別子韶顧大妹倩

案顧子韶名家駿少爲考功館甥與存古同學齊名後存古臨

刑惟顧與王勝時送之卒以康熙壬寅入學

鳳去秦樓信杳然返魂香盡斷腸年茫茫兩淚難爲別  
竹馬交情十五年

漱廣有外舍雲英者亂後嫁人感傷不置代爲賦  
之

綺羅如土錦如塵重見雲英掌上身儂未成名歡已嫁  
揚州一夢爲誰人

送教坊樂官出塞

自憐天樂未曾聞送別黃沙始見君  
愁到年年青塚月  
夢歸夜夜白門雲

咏史雜成口號十首

亡楚奇功一旦收  
蘆中人去水悠悠  
昭關煙草荒茫外  
千古何人解報仇



黃金臺下雨茫茫雲夢悲風滿大荒  
憑弔興亡千古事風流燕楚二昭王

英雄草澤氣成雲烈士遺風恥二君  
堪笑士衡歸洛後何顏更作辨亡文

遺恨殷郊太白旂黃虞千載更無依  
當時尙有頑民在何事西山獨採薇

羽扇綸巾油壁軒隆中三策爲誰喧  
英雄寂寞歸黃土千載西風五丈原

江左衣冠六代愁門庭花草色千秋  
可憐卞氏推三烈當是烏衣第一流

草澤遊魂性不馴英雄短氣未秦素書三卷尋常事  
誰是當年授履人

如花歌舞入長門腸斷君王雨露恩自請和戎青海月  
琵琶一曲向誰論

束髮從王志未除寶刀風雨拂霜花黃雲白水真人氣  
年少功名鄧仲華

蓼莪三廢有遺音嵇紹彈冠血滿襟叔夜家風豈掃地  
廣陵絕曲倍傷心

送客金陵四首

山光無限水悠悠古苑花明月滿樓送君馬上休回首

玉笛三聲二葉秋

王本作舟

此去離亭半夕陽烏啼舊闕夜荒茫

王本作滄

滔滔江水無

情極明月秦淮水一方

夜月啼雅白下城回看雙闕淚沾纓紫苔最是无情物  
偏向金鋪雨後生

紫駟遊獵孝園歸猶是罷熊鎖翠微一片鍾山陵上月  
天風吹上舊臣衣

樓雨暮懷

落月空山哭子規輕煙漠漠柳低垂登樓無限傷心事  
暮雨盈盈欲待誰

曾攜寶劍叩夷門  
朱邸蕭條席尚溫  
今日三千珠履客  
誰人知報信陵恩

樓頭口號得門字二首

樓頭花草正黃昏  
猶有殘霞過雨痕  
無限倚闌愁客淚  
隔牆斜戶聽雍門

江南日暮慘離魂  
四海交情酒後論  
露下天高腸欲斷  
秋來客散孟嘗門

錢漱廣爲余內兄  
丰姿玉立神采駿揚  
綱紀翼脩  
百行具備  
天假以年  
且有爲以死  
哲人云亡  
耶

國殄瘁哀哉得絕句十八首短歌之悲過於長  
號非有情者不足以語此

嵇阮當年二酒徒河山邈隔恨黃墟自從兩哭錢侯後  
天地傷心一劍孤

王本有侯爲家姑倩文中七字小注

九年地下文中子人世風流祇屬君今日傷心惟我在  
夜臺何日共論文

驚聞哀訃淚潸潸白玉樓成跨紫鸞二十七年回首處  
闌風煙霧逼人寒

三春湖海興如煙十載交情竟惘然重到西江秋似水  
芙蓉墜粉更誰憐

回首長歌更短吟三春唱和更沾襟  
看君壁上龍鳴劍依舊霜花夜夜深

遙憶青容淚滿巾到今天地轉風塵  
雞鳴寒夜愁難曉不見當時起舞人

當年結客少年場夜夜吳姬錦瑟旁  
腸斷幾回聞誤曲不知何地覓周郎

可憐沒後久銷形猶是生前未盡情  
夢裏對愁知己沒醒來回想忽如生

曲江紅樹有微霜七尺桐棺弔北邙  
杯酒臨風惟慟哭黃花白草月茫茫

銀釭靜夜憶殷勤  
汝已吹簫弄白雲  
十二玉闌愁倚遍  
月來移影忽疑君

秋水娟娟影若虛  
風流衛玠更何如  
可憐玉樹歸黃土  
敢學當年謝幼輿

倚樓人影落江潭  
却憶西園酒半酣  
公子風流今不見  
秋來衰柳獨參參

江風暮雨入南樓  
玉笛秋翻旅客愁  
昨夜夢君驚坐起  
一聲孤雁水悠悠

九曲秋江靜不波  
美人長往恨如何  
當年意氣歸煙霧  
地下文章泣綺羅

一  
夜西風闌闌開招魂秋草不勝哀九原道誼何人在  
千古文章未盡才

枕上相逢還說夢樽前如見不聞聲傷心驚起無人問  
獨倚寒窗月自明

玉山頽謝碧雲空落葉無情下曉風思曼風神銷歌盡  
僅留一哭待張融

落月殘霞剩錦衣淒涼玉軫斷金徽與君齊跨瑤池鶴  
同到人間獨自歸

絕句口號八首

寶身荆棘滿目風塵哀厲之詞殊乖風始聊以



紀一時流離之苦耳作者勿以風雅觀勞人草  
草於斯見之矣

去年人送短長亭一片煙波入洞庭江海無情人不見  
芳洲春草爲誰青

穀娘歸來風雨多瀟湘春盡晚生波可憐屈宋師門誼  
空有招魂弔汨羅

朱門華屋已成塵黃土荒邱不卜鄰天下文章俱寂寞  
平陵一調屬何人

昨夜驚魂渡五湖愁中飛夢到姑蘇丹陽道上南冠客  
重到新亭洒淚無

江上花飛隱釣船  
羊裘百結竟誰憐  
一人亡命無張儉  
三戶虛聲有項燕

春滿院百花明  
和淚成書問遠行  
欲寄東風無羽翼  
愁隨明月渡江城

愁來江上柳條青  
漁父狂歌忌獨醒  
高臥夢回青瑣闥  
相思人在白樓亭

無衣客子半天涯  
何處相逢拂劍花  
三月故鄉消息斷  
更呼鸚鵡報誰家

家園早梅盛開時寄跡武康

塘一作

賦以詩

一作

懷之

逢花却憶故園梅  
雪掩寒山徑不開  
明月愁心兩相似

一枝素影待人來

宴送盛伯含之金陵

盛工丹青

十載傷心老畫師孤帆歸去淚如絲  
舊京無限靈和柳折盡東風第一枝

方穀城遺孤流落郡中詩以致之

平津賓客竟誰留黃土恩深尙未酬  
縱有羊曇知舊澤還憑醉後哭西州

絕句

垂楊莫莫雨珍珍獨倚雕闌撫劍鐔  
欲待美人愁日暮斷腸風信自東南

扁舟明月兩峯間  
千頃蘆花人未還  
縹緲蒼茫不可接  
白雲空翠洞庭山

相國風流盡可師  
講壇景色似當時  
漳江一帶新栽柳  
不遣東風向北枝

大滌山頭起暮煙  
武夷人去草芊芊  
自從一閉平津閣  
珠履三千盡黯然

黃講學大滌山

藝海珠塵

南匯 吳省蘭 泉之輯  
奉賢 吳祖泰 裕傳校

夏內史集

夏完淳纂

卷八 詞

滿江紅 惆悵

淥水三年小橋畔相逢曾賦長凝竚青驄有影章臺無  
路月下凭肩衣尚煖樓邊覓約書成蠹訪城西惟有畫  
檐蛛絲如故 曉雲意人空暮題詩客愁應訴奈綠陰

滿徑午逢雀護芍藥已傳春夢遠楊花又被東風誤想  
雕闌不墜卻沾泥言還離

瀟湘夜雨

賦得微字

鶯啼花更蝶圍香國重闌朝暮愁歸墜鞭人瘦怎禁小  
風吹不爲春醒嬾起分香處燕子來窺芙蓉帳餘煙已  
渺紅淚染離袿相逢何處也難尋丹棘欲寄啼規恐  
蕭郎別後淺淡愁眉剩有菱花一半已不是那日崔徽  
長堤路桃花帶笑柳眼已含悲

魚遊春水

春暮

離愁心上住捲盡重簾推不去簾前青草又送一番愁

句鳳樓人遠簫如夢鴛枕詩成機不語兩地相思半林  
煙樹猶憶那回去路暗浴雙鷗催晚渡天涯幾度書  
回又逢春暮流鶯已爲啼鵲妬蝴蝶更禁絲雨誤十二  
時中情懷無數

婆羅門引

春盡夜

晚鴉飛去一枝花影送黃昏春歸不阻重門辭卻江南  
三月何處夢堪溫更堦前新綠空鎖芳塵隨風搖曳  
雲不須蘭棹朱輪只有梧桐枝上畱得三分多情皓魄  
恐明宵還照舊釵痕登樓望柳外銷魂

一翦梅

春日

昨夜花開第幾枝還是東風燕子來時南雲畢竟幾時  
還獨倚闌干紅雨絲絲采綠人歸有所思何事分飛  
夢到還遲含情無緒咏春愁調得新聲恐被鶯知

鵲踏枝

春閨

珠簾小婦盈盈坐不到春深不解相思苦獨倚玉闌斜  
欲語梨花幾陣黃昏雨聽宛轉聲聲杜宇回首銷魂  
無計教春去憶得舊年郎去路連天芳草斜陽渡

西江月

寫懷

紫燕來時春徧黃鸝啼處煙多過期不至奈愁何細雨  
斜風古渡離恨夜來寂寞歸期春去蹉跎盈盈江口



望煙波枉是朝朝暮暮

一翦梅

詠柳

無限傷心夕照中故國淒涼剩粉餘紅金溝御水日西  
東昨歲陳宮今歲隋宮往事思量一晌空飛絮無情  
依舊煙籠長條短葉翠濛濛繞過西風又過東風

兩同心

有夢

夢到揚州依然南浦綺羅如夢錦如塵香車寶馬知何  
處煙籠十里隋堤茫茫飛絮舉目魂銷腸斷春光如  
許瓊花消息竟飄零荒臺古苑春無主想鶯花十二樓  
前迷離煙雨

千秋歲

憶舊

幾番薄倖無限傷心景  
睂前事心頭病殘鐙餘一點恰  
把羅衣整窗櫺外一枝帶雨梨花影  
獨步東風靜訪當時花徑  
寒悄悄花光淨人去多時也  
往事猶堪省飄紅淚銀缸露滿  
鞦韆冷

西江月

春日

煙柳斜風曉夢輕  
花過雨春陰無聊無賴到而今  
又是一番花信  
枝上流鶯裊裊天涯芳草深深  
踏青何處散春心拾得半天愁悶

醉花陰

寓怨

年年風色真難買聞道春如海幾度悞佳期獨倚闌干  
錯把相思害柳絲枝上風塵債亂點幽蘭外翻解誤  
紅顏自捲珠簾日日盈盈待

望江南

江上望郎在木蘭舟遠水孤帆天漠漠斜風急雨水悠  
悠歸去不勝愁期已過不見暮帆收寂寞孤鐙寒枕  
簾徘徊殘月掛簾鉤腸斷五更頭

燭影搖紅

辜負天工九重自有春如海佳期一夢斷人腸靜倚銀  
釭待隔浦紅蘭堪採上扁舟傷心欸乃梨花帶雨柳絮

迎風一番愁債。回首當年綺樓畫閣生光彩。朝彈瑤瑟夜銀箏歌舞人瀟灑。一自市朝更改。暗銷魂繁華難再。金釵十二珠履三千。淒涼千載。

滿庭芳

永巷驚風長門送月。年年幾度傷心。銀缸點點淚滴露。華侵此夜。西宮絃管。魂夢中彷彿。車音驚坐起。孤鐙殘月。愁坐倚瑤琴。沈沈芳信杳。金鳧煙冷。銀鴨香深。聽風絲雨片。落月鳴禽。卻望君王何處。昭陽歌舞動花陰。遙思想。六龍天上。刀尺動秋砧。

柳梢青

江泊懷漱廣

玉人天際最堪憐  
月色上花枝  
暝宿吳江風  
鐙零亂一  
晌相思  
天涯何日歸  
期想攜手清  
光舊時立  
盡黃昏  
亂鴉啼處  
此恨誰知

喜遷鶯

暮雨南懷

登樓望露華新滿  
目盡風塵鶯花無主  
不勝春偏逐斷  
腸人  
郎未來  
儂未去  
獨倚雕欄  
無語淚珠  
滴滴對銀  
缸化作  
今宵雨

秋波嬌

夜泛

急棹孤舟弄晚晴  
漠漠柳煙輕  
相思半枕天涯夢  
繞依舊愁城  
思量往事  
難回首  
重到不勝情  
新愁滿地荷

香十里明月三更

一斛珠

新月

暮蟬啼後欄干獨倚芙蓉扣  
丁丁滴滴添銅漏  
萬里雲輕一點清光逗  
天涯人遠愁時候  
乍晴乍雨催人瘦  
新愁不許春山鬪  
酒醒荷香昨夜相思透

鵲橋仙

樓夜

菱花嬾對沈香幄  
燕幽恨茫茫千結待將一枕化愁腸  
卻又夢人間離別  
幾番煩惱一天愁悶  
半雨半晴時節  
猛然聽得杜鵑啼  
又早是一輪殘月

卜算子

斷腸

秋色到空闌。夜埽疎桐葉。誰料同心結不成。翻就相思  
結。十二玉欄干。風有鐙明滅。立盡黃昏淚幾行。一片  
鴉月。阮亭云寓意卽工自是再來人。

喜遷鶯

秋恨

黃昏月五更風一點。落花紅和煙和草。月朦朧。淚雨滴  
梧桐。露華深。羅被冷。疑是郎來驚醒。凌波幾步。下迴  
廊。月破風簾影。

憶王孫

珠簾斜捲翠鬟垂。曉月重樓人未歸。細按紅牙嬾畫眉。  
影徘徊。一種東風後樣吹。

浣溪沙

柳色深深聽曉鶯。玉闌愁倚夢分明。閒花斜落小釵橫。  
蝴蝶前生原夜合。楊花身後化浮萍。東風輕薄誤多情。

憶秦娥

懷遠

傷離別相思又值清明節。清明節。薊門衰草漢宮紅葉。  
愁懷萬種憑誰說。邊鴻不到音書絕。音書絕。長安何處晚山重疊。

醉花陰

柳

片雨弄愁愁未了。柳眼窺春早。深處未鶯來。弱影絲絲。



翠入晴江小 鶯黃半卻煙光曉  
翦出東風巧 借問馬頭人  
長短亭前畱得青多少

尋芳草

別恨

幾陣杜鵑啼 卻在那杏花深處小  
禽兒喚得人歸去 喚不得愁歸去  
離別又春深 最恨也多情飛絮  
恨柳絲繫得人愁住 繫不得愁人住

天仙子

春情

紫玉轆轤青錦索 金井梧桐寒寂寞  
霜驕馬上冶遊郎 花下約鐙前話  
人在畫樓牽翠幙 無奈愁人春夢惡  
淚點羅衫春袖薄 一江煙草亂相思  
當初錯而今莫雁

又不來花又落

藝海珠塵

南漚 吳 省蘭 泉之輯

奉賢 金 祖錫 价藩校

夏內史集

夏完淳纂

卷玖 檄 論 書 問

討叛降大逆臣檄

崇禎十有七年夏七月江左諸少年討降叛大逆臣曰  
運啟十華便有元黃之戰德深九世亦來赤綠之羣土  
穴廩君餘魂散野山頭廷尉逆首行邊初飛樹鶴之毛

笑漫天於阿舅纔問野豬之口談綴日於黃家兩臂揮  
汗血之鞭月中躍馬一眼見如人之石河上投戈代有  
元寬終焉分冢若我太祖駕綠蠅而首出克靖南街文  
皇行元菟以重華永清北極宣英憲孝撐梨不晦之辰  
世穆神烹若木嘗輝之旦大行皇帝代來而東南再讓  
兆洽庚庚周腴而西北多艱治先甲甲三百年之鐘虞  
德邁五三十六世之和鸞運逢百六濺衣嚴衛嗟庶見  
於槐林齧臂殉亡止相期夫椒闕雲昏雀瓦燃灰玉女  
之窗日暗龍樓花碧仙人之掌方介圭時惕不聞子弟  
梨園奈金柅頓弛誰作父兄僕射祇以甘陵有部相持

釣黨之名遂爾司馬無師莫講飲飛之技因之青袍入  
殿外朝不抱烏號黑犢驚鑾後苑惟啼苦竹引豺狼於  
中禁疇作厲階甘臣妾於敵營爭誇新寵慕容豔耦薦  
枕堅頭匍勒半人授冠鑿齒碧池舞馬并無摩詰賦詩  
金統懸雞先待日休草詔父師渠帥呼牛則夫子關西  
堯禹叛囚報李則將軍宇宙遂不憚淮淝送死急請投  
鞭復倡言許雒營田無煩運粟引弓不阻筮同鄭國之  
蛇伏劍無徒心異臨江之燕百爾朝賢交誦范陽聖人  
藐茲庶民或效宣陵孝子彼義深屬吏田疇尙哭幽州  
豈恩薄舊君豫讓乃忠智氏泥梨未滿其獄狗彘詎食

其餘倘爲于禁潛歸定台燃臍掛膽若更會之懷毒尤  
須赤族瀕宮我儕帛書自矢室劍相盟君子六千有死  
無生之氣丈人九二承家開國之心二姓老奴罪在不  
赦一門先澤義無可辭子明髭髮之年便能擊賊討逆  
成童之歲卽善揚兵誓不與此賊俱生河朔將持虎節  
請問汝元宮何在里門早樹蠶旗謹檄

土室餘論

淳之生也十有七年昊天不弔宇宙禍盈生之不辰非  
我先後先文忠投淵殉節便爾無家湖海飄零於今三  
載風旂霜厖提衿短衣備人世之艱辛極君親之冤酷

窮途歧路斷梗飛蓬日旣如流天猶共戴嗚呼淳固知  
生不如死久矣特以國難家仇未能圖報忠臣孝子自  
當笑人故飲恨吞聲苟全性命湖中之起身在行間不  
忘喪元獨當一面江東嶺表日月雙懸先文忠爲國死  
淳也爲國生于是七尺受一命之榮九重蒙三錫之典  
恨不滅此朝食下報幽冥噫以淳拜命蠟九執戈幕府  
成仁一死抑亦何言嗚呼家仇未報臣功未成齋志重  
泉流恨千古今生已矣來世爲期萬歲千秋不銷毅魄  
九天八表永厲英魂先文忠得爲皇明臣淳也得爲先  
文忠子吞聲歸冥含笑入地嗚呼淳今死矣抑又何言

獄中上母書

不孝完淳今日死矣以身殉父不得以身報母矣痛自  
嚴君見背兩易春秋冤酷日深艱辛歷盡本圖復見天  
日報大仇卹死榮生告成黃土奈天不佑我鍾虐明朝  
一旅纔興便成齏粉去年之舉淳已自分必死誰知不  
死死於今日也斤斤延此二年之命菽水之養無一日  
焉致慈君託迹於空門生母寄生於別姓一門漂泊生  
不得相依死不得相問淳今日又溘然先從九京不孝  
之罪上通於天嗚呼雙慈在堂下有妹女門祚衰薄終  
鮮兄弟淳一死不足惜哀哀八口何以爲生雖然已矣



淳之身父之所遺淳之身君之所用爲父爲君死亦何  
負於雙慈但慈君推乾就濕教禮教詩十五年如一日  
嫡母慈惠千古所難大恩未酬令人痛絕慈君託之義  
融女兄生母託之昭南女弟淳死之後新婦遺腹得雄  
便以爲家門之幸如其不然萬勿置後會稽大望至今  
而零極矣節義文章如我父子者幾人哉立一不肖後  
如西銘先生爲人所詬笑何如不立之爲愈耶嗚呼大  
造茫茫總歸無後有一日中興再造則廟食千秋豈止  
麥飯豚蹄不爲餒鬼而已哉若有妄言立後者淳且與  
先文忠在冥冥誅殛頑鄙決不敢捨兵戈天地淳死後

亂且未有定期雙慈善保玉體無以淳爲念二十年後  
淳且與先文忠爲塞之舉矣勿悲勿悲相託之言慎  
勿相負武功兄將來大器家事盡以委之寒食孟蘭一  
杯清酒一盞寒燈不至作若敖之鬼則吾願畢矣新婦  
結褵二年賢孝素著武功舅好爲我善待之亦武功渭  
陽情也語無倫次將死言善痛哉痛哉人生孰無死貴  
得死所耳父得爲忠臣子得爲孝子含笑歸太虛了我  
分內事大道本無生視身若敝屣但爲氣所激緣悟天  
人理惡夢十七年報仇在來世神遊天地間可以無愧  
矣

遭夫人書

三月結褵便遭大變而累淑女相依外家未嘗以家門盛衰微見顏色雖德昭齊魯未可相喻賢淑和孝千古所難不幸至今吾又不得不死吾死之後夫人又不得不生上有雙慈下有一女則上養下育託之誰乎然相勸以生復何聊賴蕪田廢地已委之蔓草寒煙同氣連枝原等於隔膚行路青年喪偶纔及二九之期滄海橫流又丁百六之會熒熒一人生理盡矣嗚呼言至此肝腸寸寸斷執筆心酸對紙淚滴欲書則一字俱無欲言則萬般難吐吾死矣吾死矣方寸已亂平生爲他人指

畫了了今日爲夫人一思究竟便如亂絲積麻身後之事一聽裁斷我不能道一語也停筆欲絕去年江東儲嗣誕生各官封典俱有我不曾得夫人夫人汝亦明朝命婦也吾累汝吾誤汝復何言哉嗚呼見此紙如見吾也外書秦篆細君

燕問

有客問於夏子曰蓋聞九土星羅不以邊陲爲襟帶八紘繡跣不以荒裔爲褰區燕之立國逼處夷落號爲四戰帝宇晚立遂制中原子其述河冀之雄躔暢幽燕之洪緒以黼黻神京憲章河雒夏子曰夫燕都者舍跨太

行枕倚居庸左倚秦齊右屬岐雍名疆迭郭晉絳重封  
卻背重阻外合中通連汾潞漳土厚成膏水陸輻輳雨  
散雲

以下闕

藝游珠塵

南漚 吳省蘭 泉之輯  
奉賢 金萃階 聚之校

夏內史集附錄

桐城方子畱授南冠草序壬辰冬偶遊四明與朱陸諸  
子論甲乙以後忠節及松江諸公余言夏瑗公師死最  
先其子完淳字存古以十七死其人其文古未有也諸  
子請其詳余曰存古五歲知五經九歲善詞賦古文十  
六十七與友人有事會中會江東有詔諡瑗公師文忠  
蔭一子中書存古乃上表及疏稱中書臣完淳以進報

某虛實約兵以某日航海會某所爲邏卒所獲就鞠金陵某某欲活之曰汝年少豈知兵存古曰吾年少豈遂不知兵某曰汝口何不惜汝身曰倘死而復生他日

必先文忠與我也身何足惜因顧謂其婦翁曰男兒死身何能作求生狀遂就義於金陵之西市諸子曰有是哉恨未見其人也其疏及表在乎余曰微獨疏表在向余過武林蔣氏兄弟見存古有大哀賦有獄中上太恭人書寄錢孺人書有示同事諸友書有自訂詩近千首此存古之文也已又得其南冠草因出示諸子諸子請歌之余爲之歌別雲閒諸子曰壯哉往而不返者也

何鶴唳之足悲乎爲之歌辭恭人曰哀而不怨太恭人  
有子復何恨爲之歌寄內曰嚴而婉責其婦以程嬰乎  
余輟歌曰存古死而遺腹得一子一女天之報施不爽  
哉爲之歌寄姊及甥曰甚矣哉大仇其可忘乎爲之歌  
寄半村及聞大鴻訃曰其皆死心乎是知生而知死者  
也爲之歌細林曰知大夏者其孟公乎非孟公而細林  
之哭誰能若是爲之歌遇子高及轅文曰是真可以告  
友朋乎又何知友之明也爲之歌入京及被鞠諸什曰  
至矣哉烈而醇苦而甘怨而溫直而不屈勇而不懼靜  
而不亂思而不貳求仁而仁取義而義惟故國之傷也



以忘其身與家如存古者忠孝兼之矣而以十七傳古  
今未嘗有也南冠草者可以名存古之人可以名存古  
之文矣因手訂之而命予爲敘

明州陸明懷字燦南冠草序嗚呼此夏子絕筆也余讀  
而歎曰忠孝也經濟也文章也至夏子而觀止矣乃其  
年更不可及也國初沐黔寧鄧衛公俱以十六七垂功  
名而文采或不彰解吉水年十八上庠西封事萬言乃  
不死爲周紀善作傳有遺議焉王義烏使諭滇南詈脫  
脫以死至今生氣然年五十餘矣若夏子不更奇哉嗚  
呼本朝非無事也使夏子不生於今日何必不與金華

當塗以文章開草昧不然何必不與北地瑯琊以翰墨  
潤太平卽欲以盤錯顯則何必不於己巳己卯之閒附  
忠肅文成以自見卽不幸而以死殉乎則何不於靖難  
之後與方練諸公同碎首而乃生於斯世也不亦痛乎  
予用是悲其遇慕其人而不得見將見其詩若文全集  
又未遑得則先梓此南冠草是亦丹穴之片羽也然亦  
可從斯以見夏子矣

蛟州范香谷兆芝南冠草序國家之故非一要必有忠  
孝卓犖之士生之也功不必其成也故博浪之椎奮而  
祖龍之氣奪卽身亦不必其生也歌平陵東者不絕於

耳而後南陽之氣振是世之升降如粉本而人之生死成敗於其際者如青黃焉丹雘焉非然則史冊亦幾乎寂寞矣昭代自甲申後有志者欲自振拔其人益張事益奇爲史策生色益絢夏子存古其一也或曰惜也人固不可無年以夏子之才而用諸老成功名必有可觀或曰悲哉夏子生不辰漢文有言子當高帝時萬戶侯何足道或曰惟瑗公先生之文爲談爲彪惟夏子之文爲遷爲固藉玉步不改著書石渠天祿間詎非一代光悲哉夏子辰安在或曰夏子過矣何不隱忍以待功臨耿鄧而一蹶不收盛事不再若然是悲夏子之身死而

功不就也是欲忠孝卓犖之士必生於功名之會也乃  
夏子死而甲申以後藉以不寂寞則死有時賢於生而  
功何必不在天下哉今其詩具在使後死者知甲申之  
後猶有人則天下方在夏子之青黃丹牒中又何事爲  
惋惜也

四明董佩公劍鏐南冠草序陳夏文章齊名海內幾三  
十年矣昔常一謁陳先生先生神宇嶽嶽望之心死用  
是益神往於夏先生甲乙以來兩先生相繼死節益爲  
華夷萬禩重齊名又不僅以文章矣及讀南冠草斂容  
起曰兩先生亦厚幸哉始同郡同學同負物望又同中

春官同盡節死兩先生亦厚幸哉不謂夏先生之後復有存古中翰也雖然父子朋友之間氣自相貫有陳先生有子得如存古否余又因存古而益神往於陳先生之令嗣矣我友范子香谷陳先生門下士也試爲我問之

鍾廣漢淵映云陳大樽選明詩存古年纔十餘耳而宋轅文援其論詩以作序此時已許其作後進領袖矣迨十五從軍十七授命磨盾草檄不異老生宿儒洵異稟也

計子山南陽弔存古詩云一時義旅日紛紛石友同歸

有數君海上龍旂終不見山中鶴唳竟無聞銀烏永夜  
啼明月黃鵠三秋怨白雲渺渺故園離散後可憐風雨  
浸孤墳濁醪長夜自從容一曲瑤琴恨未終雒下書生  
空作賦漢廷才子爲誰雄魂依杜宇三更月氣作雲霄  
百尺虹此去巫陽招未得大江千里暗丹楓  
沈確士德潛云存古生爲才人死爲鬼雄汪疇不足多  
也詩亦高古罕匹

關 名成仁錄云夏完淳者字存古華亭人吏部郎中  
允彝之子也年十六從師陳子龍起兵太湖遭父遺命  
盡以家產餉軍魯監國遙授編修子龍戰敗完淳走吳

易軍爲參謀被執至畱都經畧洪承疇欲寬釋之謬曰童子何知豈能稱兵叛逆誤墮賊中耳歸順當不失官完淳厲聲曰我嘗聞亨九先生本朝人傑松山杏山之戰血濺章渠先皇帝震悼褒卹感動華夷吾常慕其忠烈年雖少殺身報國豈可以讓之左右曰上座者卽洪經畧完淳叱之曰亨九先生死王事已久天下莫不聞之曾經御祭七壇天子親臨淚滿龍顏羣臣嗚咽汝何等逆徒敢僞託其名以汚忠魄因躍起奮罵不已承疇色沮無以應時完淳婦翁職方司主事錢旂同在訊氣稍不振完淳厲聲曰當日者公與督師陳公子龍及完

淳三人同時歾血上啓國主爲江南義舉之倡江南人莫不踴躍今與公慷慨同死以見陳公于地下豈不亦奇偉大丈夫哉旃遂不屈與完淳同死完淳時年十六先是國再變爲大哀賦萬餘言淋漓愴痛世爭傳誦別著有南冠草一卷

王鴻緒明史彙纂允彝字彝仲松江華亭人弱冠舉於鄉好古博學工屬文是時東林方講學蘇州高才生張溥楊廷樞等慕之結文會名曰復社允彝與同邑陳子龍何剛徐孚遠王光承輩亦結幾社相應和名重海內崇禎十年與子龍同舉進士授長樂知縣善決疑獄他



郡邑不能決者上官多下長樂居五年邑大治吏部尙書鄭三俊舉天下廉能知縣七人以允彝爲首帝召見大臣方岳貢等力稱其賢將特擢會丁母憂未及用北都變聞慟哭累日毀家倡義走謁尙書史可法與謀興復聞福王已立乃還其年五月擢吏部考功司主事疏請終制不赴及馬士英阮大鍼亂政重允彝名屢爲好詞招之拒不應服旣除猶不赴御史徐復陽者故逆案中人至是復官希要人旨劾允彝及其同官文翼德居喪授職爲非制以兩人皆東林也兩人實未嘗赴官無可罪吏部尙書張捷遽議貶秩調用時論爲之不平未

幾南都失傍徨山澤間欲有所爲聞友人徐石麒侯峒  
曾黃淳耀徐汧等皆死乃以八月中賦絕命詞自投深  
淵以死允彝學務經世歷朝制度暨昭代典章無所不  
諳習獨處一室志常在天下名旣高四方人士爭走其  
門書問往來酬答無暇暑獎勵後進有片言善稱之不  
容口多因以成材與子龍齊名晚節亦畧相似人謂白  
首同所歸云子完淳字存古生有異稟七歲能詩文年  
十三擬庾信作大哀賦按大哀賦作於乙酉以後殉難在丁亥若死年十八則作賦應  
在十六歲如成仁錄云十六殉難亦是十四五作賦不當云十三也文采宏逸允彝死後  
二歲以子龍獄詞連及亦逮下吏談笑自如作樂府數

十闕臨刑神色不變年甫十八允彝兄之旭字元初以諸生貢於廷有聲南都失欲死允彝託以妻子乃不果自此不入城市亦以子龍故作絕命詞從容謁文廟自縊復聖位旁

吳履震五茸志逸隨筆明處士夏之旭絕命辭我於甲申春遭先帝之變已無意人閒世矣奈以家累牽纏妻沈氏死於乙酉三月於五月幼子復死遂削髮於竹籬菴不幸八月松城破予弟仲彝殉節余時欲與弟同死因孤寡幼弱弟堅囑予畱看孤寡遂覩顏視息焚修奉佛不入城市不見親友此松郡萬耳萬目不可掩也今

年四月間忽傳吳鎮有復明之舉余曰徒使生靈塗炭耳遂避跡松塘荒僻之地一日方督耕田所忽有憲牌坐予爲陳子龍叛黨捕役先擒予次子詣私室酷刑逼詐予時聞知不覺髮指背裂欲挺身就戮獨念叛無實據入以不赦之條皇天后土實鑒臨之但今之所謂叛乃明朝之所謂忠也彼加我以叛名乃加我以義名耳何妨一笑受之有勸予者曰土撫臺公平詳慎何不出辨而還自裁余曰我生平豪傑自命今以方外自處何等高潔乃囚首屈膝求活於公府之庭不亦羞當世而負生平耶然不死於家而死於聖殿幼讀聖賢書而死

聖賢地之旭死於聖賢之教非死於清朝也爲清朝之  
官者苟良心不死天理猶存於枉死者亦一勳念乎抑  
予更有說焉人壽幾何富貴幻泡幸當事者少存慈祥  
寬釋冤累以求免於劫運循環未必無少裨也慈憫衆  
生饒舌勸化又自笑其婆心矣

華亭馮鼎位素生休菴偶筆丁亥四月十七夜提督吳

兆勝於府後朱房

卽今之  
婁署

大開宴遍邀府廳縣及諸營

將畢集惟傳太守病不赴酒半輟席起忽出一冊置几  
上陳筆墨硯各令簽押共盟舉兵海防楊之易理刑方  
重朗不從立手刃之華令潘必鏡長跪哀請得免四鼓

令各兵易衣帽上城東盼海舟無一至西候湖寇亦寂  
然詹大廳素狡猾知事不諧卽手擒吳帥星飛赴軍門  
告變撫臺土國寶上疏發已大人率滿兵會同土撫陳  
操江錦至松駐劄跨塘橋西遍拏湖寇審知卽斬如陳  
如殷如夏如葛波連數十家解京正法滿漢官皆慕陳  
黃門名惜其才語之曰公若降當特疏以原官起用不  
次高擢陳不跪不揖南向席地坐但以速死爲幸衆欲  
殺之士猶不忍屬將領請至舟次以甘言誘之至晚乘  
閒自投河死仍戮其屍梟首懸示西門殷則至死倔強

楊陸榮三藩紀事本末順治四年丁亥四月松江提督  
吳兆勝據城以叛先是三年丙戌六月李成棟調往福

建北勝移鎮松江有周謙者故從白黨來降者也稍知  
文墨兆勝噫焉因通海寇黃斌卿令舉兵內向給事中  
陳子龍舉人殷之輅生員張寬等皆與其謀斌卿約于  
四月十六日兵至而海舟非風不行連日北風大作舟  
不時至海防同知楊之易推官方重朗知其謀潛移書  
洪承疇言兆勝反狀承疇未之信卽以其揭下兆勝兆  
勝大懼十五日夜將半以令箭促之易重朗至殺之意  
明日黃兵必至也天旣曙城門寂然副將詹天祥知事  
不濟卽同都司高永義率兵入執兆勝按詠將校十七  
人二十四日大兵至松江執子龍于廣富林子龍乘閒  
赴水死出其屍戮之子陳時方五歲  
亦論殺殷之輅逮至南京斬於市  
蘇州府志劉曙以舟山事械送金陵下獄八旬與崑山  
顧咸正松江夏完淳及同邑管定縱橫詩酒談說忠義  
爲樂丁亥九月十九日赴市連呼高皇帝而死  
嘉興府志曹度字正則邑廩生少負雋才博通經史旁

及天文歷數諸書靡不究覽工書法善詩文夏考功允  
彝賞識之命其子完淳執弟子禮

藝海珠塵

夏內史集附錄

十